



GOVERNUN KONSTITUSIONAL DA-IV SEKRETARIA ESTADU KONSELLU MINISTRU

KOMUNIKADU IMPRENSA

Sorumutu Konsellu Ministrus loron 25 Agostu 2010

Konsellu Ministrus hasoru-malun iha Kuarta-Feira, loron 25 Agostu tinan 2010, iha ninia Sala Sorumutu nian, iha Palásiu Governu, iha Dili, no aprova tiha:

1. Dekretu-Lei ne'ebé mak altera Orgánika Ministériu Negósius Estranjeirus

Diploma ida-ne'e, ne'ebé aprova ho alterasaun sira, iha ninia objektivu atu halo sai di'ak liután promosaun interese Estadu no Povu nian iha Timor-Leste iha estranjeiru no atu valoriza papél Ministériu Negósius Estranjeirus nian hanesan departamentu governu nian ida-ne'ebé responsável ba halo formulasaun, kordenasaun no ezelesaun política iha rai-liur.

Nune'e, mak funsaun hirak fó ba iha Servisu Ministériu Negósius Estranjeirus nian a, hanesan Sekretaria-Jerál, Gabinete Inspesaun no Auditoria, Diresaun Nasionál Relasaun Esterna, Diresaun Nasionál Integrasaun Rejionál no Diresaun Nasionál Asuntu Konsulár no Komuidade Timór nian sira sai klaru. Sei harii fundu ida ba Relasaun Internasionál hodi bele apoia iniciativa hirak espesial kona-ba política rai-liur nian, hanesan asaun no projetu hirak kona-ba koperasaun internasionál no ajuda umanitaria. Sei harii mós Sentru Estudu Diplomátiku hodi bele forma no valoriza tuir dalam profesionál nian funsionáriu hirak atuál no ba futuru iha Ministériu Negósius Estranjeirus nian, liu-liu ema diplomata sira.

2. Dekretu-Lei ne'ebé harii Rejime Espesial kona-ba atu hamosu lalais kedas Sosiedade Komersial sira ("Empreza ho oras")

Ho Diploma ida-ne'e mak harii ona prosedimentu espesial ida kona-ba formasaun no rejistu imediatu nian iha bainhira atu harii sosiedade komersial sira, ne'ebé hala'o iha departamentu rejistu komersial iha Ministériu Justisa, iha loron hanesan no hodi hala'o de'it atendimentu úniku. Prosedimentu ida-ne'e inklui publikasaun no komunikasaun ne'ebé mosu hosi rejistu, ba iha departamentu ministerial hirak seluk ne'ebé iha kompeténsia lejislasaun nian kona-ba inisiu atividade sosiedade komersial hirak ne'e nian, nune'e mós kona-ba atu rekolla no transmite ofisialmente ba iha departamentu ministerial hirak ne'e, liu hosi via eletrónika, informasaun hirak destina ba sira, hodi hetan legalizasaun.



Diploma ida-ne'e mós halo alterasaun ruma kona-ba lejislasaun ne'ebé mak regula rejistu komersiál no lejislasaun notariál, hodi bele hetan regulasaun ida klean liután kona-ba rejime ne'ebé mak regula aprovasaun ba entidade komersiál sira nia naran no ba loke tan kompeténsia ba tradusaun dokumentu hirak hakerek ho lian estranjeiru.

3. Dekretu-Lei kona-ba Estatutu Karreira Dosente

Estatutu kona-ba Karreira Edukadór labarik sira nian no Profesor Ensinu Báziku no Sekundáriu sira (Estatutu Karreira Dosente) aprova forma própriu ida kona-ba organizasaun klase, promove mekanizmu hirak kona-ba formasaun no avaliasaun ba dezempeñu dosente sira nian ne'ebé bele garante qualidade hosi sistema edukasaun no ensinu nian no konsagra Prinsípiu hirak kona-ba Méritu no kona-ba Kualifikasaun. Diploma ne'e asegura mós rekoñesimentu ba esperiénsia sira hetan iha durante tempu barak nia laran no garante atu dosente sira hotu ne'ebé hala'o sira nia funsaun iha tempu uluk molok Estatutu ne'e vigora sei hetan asesu ba formasaun no kualifikasaun hirak kondigna ba sira nia funsaun hirak kabál no meritóriu.

Atu hanoin de'it katak durante tranzisaun ba ukun-an Timor-Leste nian manutensaun sistema Edukasaun no ensinu nian sai tiha dependente ba esforsu no dedikasaun timór-oan barak nian, balun ne'ebé mak la iha kualifikasaun hirak presijz ba hanorin nian, maibé la interrompe funcionamentu sistema ne'e nian. Buat ida tan katak klase dosente nia misaun mak atu eduka labarik sira iha Timor-Leste, hodi kontribui direta no desizivu ba futuro Nasaun ne'e nian. Faktu hirak ne'e bele hatudu importánsia atu organiza atividade dosente sira nian tuir prinsípiu hirak aas kualifikasaun, méritu, solidariedade no dignidade profesionál nian.

4. Projektu Dekretu-Lei ne'ebé aprova Estatutu Universidade Nasionál Timór Lorasa'e (UNTL)

Projektu Dekretu-Lei ida-ne'e hatudu nesesidade atu dezenvolve modelu organizasaun nian ida ba Universidade Públika Timor-Leste nian iha nível nasional, ne'ebé bele adapta inovasaun no evolusaun atu hatene promove koñesimentu liu hosi disciplina hirak nia laran, nune'e mós jestaun ba rekursu hirak ne'ebé oras ne'e iha.

Modelu organizasaun nian ida-ne'e tau konsiderasaun ba nesesidade atu reforsa artikulasaun política hirak estratéjiku iha Universidade atu dezenvolve ekonomia no sosiál hodi sustenta País ida-ne'e, hodi adopta descentralizasaun ba ninia Unidade Orgánika sira iha rejiaun oin-oin, liu hosi jestaun ida integradu entre ensinu no investigasaun tama tan ho karaterística no potencialidade hirak iha ekonomia, sosiál no kulturál rejiaun ida-ida nian.



Konsellu ministrus mós analiza tiha ona:

1. Apresentasaun hirak kona-bá “Hasa’e Bandeira Nasionál”

Bandeira Nasionál mak Símbolu ne’ebé aas liu buat hotu tanba reprezenta Nasaun, la’os de’it iha Territóriu Nasionál, maibé mós iha Territóriu Internasionál. Bandeira Timor-Leste nian ne’e hafoin hasa’e ho solenidade iha loron 28 Novembru tinan 1975, la hasa’e tan iha durante tinan 24 nia laran iha okupasaun estranjeiru nian. Ikus-mai, iha loron 20. fulan Maiu tinan 2002, Bandeira Timor-Leste nian ne’e hasa’e fila-fali iha rin prinsipál iha sidade Díli, kapitál Nasaun nian, hodi marka solenidade loron independénsia nian. Hafoin ukun-an, Bandeira Nasionál ne’e hasa’e dala haat iha tinan ida nia laran, iha loron hirak nasionál Timor-Leste nian.

Bandeira Nasionál hanesan Símbolu ida aas liu iha Nasaun ida nia laran, no ho objetivu atu hametin patriotizmu no respeito ba Símbolu ida-ne’e, mak Konsellu Ministru analiza tiha ona proposta atu hala’o prosedimentu kona-ba Hasa’e Bandeira Nasionál nian iha Territóriu Nasionál tomak, pelumenus fulan ida dala ida.

2. Projetu Dekretu-Lei ne’ebé harii Polísia Investigasaun Kriminál

Projetu ida-ne’e prepara atu harii Polísia Investigasaun Kriminál Timor-Leste nian. Organizmu ida-ne’e hakarak atu sai nu’udar Korpu Superiór Polísia nian, ne’ebé la depende ba Polísia Nasionál Timor-Leste (PNTL), maibé depende hanesan orgánika hosi Ministériu Justisa no tuir funsaun hosi Ministériu Públiku, ne’ebé mak fiskaliza nia, nia mós iha autonomia téknika iha hala’o investigasaun ba krime, hodi hetan tulun hosi Autoridade hirak Judisiária nian.

Objetivu mak atu fó ba Polísia Investigasaun Kriminál, teknika hirak ho qualidade aas, hodi hetan asesu ba iha meiu hirak presiza atu kombat krime.